

丁文誠公奏稿

丁文誠公奏稿

卷之十八目錄

蔡逢年參案議結摺光緒五年十二月十九日

傅慶貽革職免議片

同日

清查鹽務妥議章程片

同日

遵旨明白回奏摺光緒五年十二月二十日

憑陳辦事竭蹶情形片

同日

都江堰歲修親往查驗片

同日

接收伊犁敬陳管見摺光緒六年正月十九日

籌款解直募勇片

光緒六年二月初一日

川鹽濟楚請減引辦理片

同日

月 日

官引票釐局戊寅綱行銷收豐旺片

光緒六年

滇黔官運戊寅綱行銷收數經徵各款摺

光緒六年

二月初十日

保舉人才堪備任使摺

光緒六年二月十九日

蔡逢年參案議結摺

光緒五年十一月廿一日



日

奏爲查明已革道員紊亂鹽法索受規費並私扣釐金平  
餘等款恭摺具陳仰祈

聖鑒事竊

臣欽奉

上諭丁寶楨奏查明道員操行貪污辦事朦混一摺四川  
鹽茶道蔡逢年著卽革職其承辦引張如查有不實不盡  
再行從嚴參辦等因欽此維時臣先奏委藩司程豫署臬  
司崇綱會同署鹽茶道董潤候補道馬映奎錦瑞督飭委  
員在鹽署設局檢齊各案卷澈底清查當卽欽遵轉行去  
後茲據該司道等會詳遵查得光緒四年分部頒川省水  
陸額引十六萬八千四百零七張又另發餘引五千張如

額引不足准於餘引內提補歷年咨部有案蔡革道初次  
查報短少額引三百九十四張請於另頒餘引五千張內  
照數撥補額引迨後私將餘引填入歸丁引張之內而以  
歸丁之引提作發商行銷之引以致應存應發各引混淆  
不清今委員等詳細查點計餘引短少十四張額引多出  
十四張不但與部頒引數不符且與該革道原報領引數  
目亦復互異又查得銅梁井研兩縣鹽引已於道光三十  
年奏明改課歸丁其引應截留道庫今於銅梁縣歸丁引  
內清出水引三張井研縣歸丁引內清出陸引二張引內  
所載水陸字樣均係挖補填寫且有將總督蓋用關防挖  
損一角者而所挖補之引中縫部編號數與前後各引號

數均不相符明係挖補行銷後插入充數並查廣安州鹽商涂俸祥萬縣鹽商文子英於光緒四五兩年先後改引各呈內聲稱引有破爛挖補字號模糊經過關卡不得留難阻滯等語係屬違例之事蔡革道概行批准並照錄該商原呈分飭關卡放行不准留難阻滯使設關查驗之例均成虛設奸商得以恣意舞弊前據蔡革道稟覆內稱領引時初次查點計少額行正引三百九十四張開單附卷後經查出實在只短額行正引三百八十張而詳咨繳引文內仍敘爲三百九十四張係漏未更正是虛報短少額引十四張已據自認不諱且明知虛報短引張數當時不將舞弊經書詳明究辦又不將多提餘引十四張照數追

徵顯係有意徇隱又據蔡革道覆稱前因查點額行正引  
短少張數將餘引提入歸丁引內又將歸丁之引提補發  
商正引係查照舊章辦理現查歷年頒引卷宗並無似此  
輾轉騰挪之案是所謂舊章者實屬無據殊不足信至於  
挖補水陸之引現據青隄渡驗卡查出廣安州代商涂俸  
祥挖補引紙五十七張解省查驗屬實此皆係蔡革道任  
內不准關卡查詰已經配運之引弊端尤爲顯著又查永  
甯縣額行陸引三千三百張均經蔡革道編號送印乃其  
中重號之引共有一千三百張之多行銷諸多空礮業經  
詳請更正咨部立案又查得合州樂山洪雅內江等處水  
陸引張蔡革道已批准歸丁並不照章將引截留道庫仍

一面含糊發引既使糧民代完商人之課又使奸商領銷  
無課之引辦理自相矛盾致各屬印委各員無所遵守或  
於引鹽過關之時聲稟請示或於引課歸丁之後仍請援  
案發引紊亂鹽章無過於此此蔡革道任內領引發引各  
案之情形也至川省鹽務向有以此岸之商兼領彼岸之  
引謂之改代又有以此岸之引另配彼岸之鹽謂之改配  
原以商力有厚薄廠鹽有盛衰故不得不變通辦理定章  
應由道查看情形詳明核准方能照辦蔡革道任內改代  
改配各案自光緒二年六月初二日到任起至光緒五年  
六月十三日交卸止先後改過三百八十七案共改過水  
引二萬三千一百五十八張陸引六萬四千八百零四張

水陸折合共改過水引二萬八千三百四十二張爲數如  
此之多均無詳明案據向辦章程不符且開縣鹽商張  
可傳呈請改代一案有挖補商名批呈前後不符之弊廣  
安鹽商涂俸祥暨萬縣鹽商文子英請改各案有挖補引  
張不准關卡留難及字號模糊不准關卡盤驗之弊鄆縣  
鹽商熊煥亭長壽鹽商戴春呈請改代並請展限各案有  
一改已誤再請改配一展不已再請展限之弊他如湖北  
鶴峰州八州縣改代改配引數浮於額引之數尙不在此  
弊竇叢雜檢查各卷實屬駭人聽聞又訊據成華總商朱  
崇庚暨行號何永泰供稱向來改代改配每改水引一張  
共需規費銀四兩二錢內除上費銀三兩九錢六分房費

銀一錢五分餘銀九分作具呈雜費所有改引規費銀兩  
均係行號送交鹽署門丁收繳其請改展限每水引一張  
亦需規費銀一兩六錢六分等語並據何永泰呈出改引  
帳簿三本係開載蔡革道任內改引規費細數查核簿載  
所送銀數與供相符果如該商所供鹽署於改代改配各  
案均有收取改費情事無怪奸商猾吏因緣爲奸明目張  
膽朦混請改遂至無呈不准並有不准關卡查驗之札該  
司道等現旣查有案據訊有供簿不敢稍涉迴護惟有據  
實具詳此又蔡革道任內改代改配各案收受改費之實  
在情形也至每年徵收課稅羨截硃力以及引釐餘釐各  
款均係報部正供軍饑攸關卽鹽釐公費餘平等項已奏

明由正釐項下劃出自應撙節支銷留備本省公用豈容私行挪移任意扣出乃查蔡革道任內實徵庫收各簿冊光緒二年分廣安州額徵鹽羨截銀一千四百零八兩五錢已於光緒三年三月二十二日全數申解到道印發批迴諭知庫吏彈收儲庫各在案蔡革道辦理光緒三四年奏銷仍列未完項下將該署州張爾達兩次開參又華陽縣認銷宣恩縣咸豐十一年分水引應完鹽羨截銀二百九十六兩五錢五分早經如數全完誤撥他縣項下蔡革道辦理光緒四年奏銷未經詳明更正仍將該署縣賈孝彬作爲未完開參是其將已完羨截挪抵他縣課稅以爲規避處分地步顯然可見並查蔡革道任內徵收各項鹽

釐除應扣報部之短平及應補火耗不計外復添出外短  
平外短水短新平短例平各項不經名目計任內共扣去  
銀八千三百三十一兩二錢七分七釐均於解到鹽釐正  
項內先行扣出仍將所扣之數作爲各屬欠解平水之款  
札飭印委各員令其照數補解而各屬因其名目不經向  
所未有無力填補置之不顧而道署亦不復催卽照扣淨  
實數登入庫收簿內致歷年庫收正釐不敷各屬原解之  
數而新添補平補水銀數仍屬虛懸是鹽釐並無補平水  
之實而道署已暗收扣平水之利至修理衙署等項歷係  
先詳後支方昭慎重乃蔡革道任內修理衙署等項先後  
六次動支鹽釐公費及富榮局鹽釐餘平銀二千六百六

十九兩一錢一分旣無詳院案據亦無修估工料支銷簿冊且本年六月初九日奉札撤任之後猶借支餘平銀一千三百餘兩稱爲歲修本署之用其爲借端開銷亦可概見又鹽釐專供軍餉動支卽應詳明奏咨作正開銷本年六月初九日該革道已經奉札撤任復在於傾淨鹽釐項下預劃出平餘火耗銀九百八十七兩二錢三分四釐爲本任俸薪養廉不敷坐扣之用旣未具詳候批卽係私自虧挪前經司道等開單呈詳已蒙批飭蔡革道勒限繳還此又蔡革道任內私行虧挪擅行提扣正耗各款之實在情形也以上各節均經該司道等查有案據訊有供單呈有簿冊事閱引目混淆款項轉轄丁書商號因緣爲奸弊

寶叢雜蔡革道不行嚴禁復爲多方掩飾始終徇隱旣有收受改費情事且有私自挪扣釐金擅扣平水之款應如何辦理之處該司道等未敢擅擬請示核辦前來

臣

查川

省鹽務自道光三十年前督

臣徐澤醇清查之後迄今已

三十載不惟以前殘積各引未能清繳彌補積欠銀兩未

能照完乃復增出未繳殘積鹽引多至一百餘萬張又增

出積欠羨截銀多至一百四十餘萬兩皆由官吏商人通

同作弊勾串營私以致鹽務之壞至於不可收拾

臣前年

抵蜀後悉心查核粗知其弊卽漸次力圖整頓嚴革陋規

清釐引岸開辦官運分設引釐各局以期正本清源年來

邊計各岸已覺日形暢銷當蔡逢年在任時

臣每與司道

接見俱以該道署弊端極大亟應認真清釐隨時諄囑該道共矢清白協力整理以期上裨

國計免致受累不啻舌敝唇焦並以鹽署公事較繁爲之寬籌公費俾免竭蹶從公實深冀其能自悔悟乃蔡逢年負玩性成膜視臣言於發引則棼如亂絲於鹽岸則無處不改於商人則縱令舞弊並以得收使費私扣釐金爲固有之利初不料其利令智昏遂至此極經該司道會同檢卷確查均有案據因近在同城奉委清查聲明未敢定擬臣若不據實參辦何以杜積弊而倣效尤雖川省鹽務之壞不自今始而蔡逢年在任三年不但毫無振作抑且踵事增弊致壞綱領即使盡法懲治亦屬咎有應得惟念該

道署一切弊端沿已久卽該革道暗收商人使費私扣  
鹽釐平水各款實屬貪婪不職然臣此次清查鹽務實因  
積弊過深不得不澈底查明以便妥定章程冀爲日後永  
遠遵行地步期於公事有裨而已現據該藩司程豫等查  
案詳辦前來臣惟該革道諸凡營私因仍作弊揆之於法  
實無可寬而究之作弊不自伊始情亦尙有可原惟有仰  
懇

天恩俯准姑寬旣往嚴倣將來相應請

旨將已革鹽茶道蔡逢年發往軍臺効力贖罪以昭懲戒  
而肅鹹務出自

逾格鴻慈仍勒限半年飭令該革道將扣挪釐金平餘銀

兩悉數繳還歸庫不准再有延玩至積年已行未行挖補  
引張已由臣督飭接署鹽茶道董潤定立限期分別飭屬  
照數繳銷再爲設法辦理不許各商任意配運以杜重照  
影射各弊再查蔡逢年前將永甯縣額引三千三百張編  
號送臣署蓋印內有重號之引一千三百張係屬鹽房誤  
編臣當時未經看出事後始行飭道另編更正咨部存案  
疏忽之咎亦所難辭並請

勅部將臣議處以爲辦事草率者戒除將該司道詳定通  
省鹽務善後章程另行奏咨外所有遵  
旨查辦緣由理合恭摺具奏伏乞

皇太后

皇上聖鑒訓示謹

奏

傅慶貽革職免議片

光緒五年十二月十九日

再川省鹽務積滯引張之多積欠羨截之鉅爲他省所未有臣詳細體察在同治七八年以前猶可藉口於滇黔邊岸久未疏通迨同治九十年以後邊岸旣漸有轉機而清楚引張定爲五邊一計銷行亦暢何至引積羨懸轉甚於前數倍且釐金亦逐年遞減推求其故始知前任四川鹽茶道傅慶貽在任時創爲撥釐作羨之法自此羨釐兩項頗多含混以致收數愈形短绌隨飭清查局司道督飭委員檢查同治九十年以後鹽署檔案切實核擬茲據詳稱傅慶貽任內創議撥釐作羨係於商人應完釐金項下准其每引一張撥出釐銀二兩抵作應完羨截二兩註冊收

庫計自同治十一年三月初一日傅慶貽定章撥收起至光緒三年冬間奏改官運停撥止前後五載有餘僅收過撥釐作羨九七平九九色鹽釐銀一十四萬七千三百七十一兩零折實淨收庫平色銀一十三萬八千八百四十五兩零復按引分算其各任欠收羨截銀數自同治十一年三月初一日起截至光緒二年年底止除撥釐填羨外各商實共欠羨截銀三十九萬二千五百一十九兩九錢零其光緒三年十一月以前短欠銀三萬三千六十六兩有零尙未併計在內綜計自咸豐元年起至光緒四年止前後共積欠鹽羨截銀一百四十萬一千一百八十五兩六錢零該司道查近年奏銷冊籍比較各年欠數同治十

一年以前未經撥釐作羨每年積欠羨截不過四五萬兩至同治十二年以後業經撥釐作羨每年積欠羨截轉多至八九萬兩及至光緒三四兩年奏改官運停止撥羨每年鹽道衙門計引積欠又不過三萬數千餘兩此中得失較然可覩是傅慶貽創爲此法名爲撥釐作羨實則挪釐減羨耳且稱撥釐之後餘羨務令補清一似於釐無損而於羨且有益者一時朦混詳准豈知商人趨利隱壞嵯綱不但應補羨銀不肯補清且比上年解徵之數多寡懸絕卽如富順縣因商人不完新徵羨截續稟請將本年撥收之釐抵解本年新徵之羨一案經傅慶貽嚴批申飭責其孤沙抵水一面詳明嚴催謂撥釐之款原爲彌補舊欠不

准挪抵新徵今若由縣挪抵每屆新徵商人卽專恃此項撥釐作抵新徵之羨必難催收舊欠更何從籌補等語可見撥釐作羨之弊傳慶貽早已洞悉如肯卽時據實更正截然停止其時虧欠無多尙可設法彌補乃因循不改年復一年坐使

國家數十萬之正供化爲烏有實爲可惜當日如果爲恤商起見但將一切陋規浮費稍加裁減已足相抵何至挪減釐羨正款如謂減羨撥釐實出於萬不得已則與其減羨二兩不如減釐二兩蓋每引減釐二兩不過二兩而止其未減之數猶可照常徵收也乃不減釐而減羨則是本引之羨旣以此釐撥收他引之羨又以此釐抵報所撥止

一引之釐遂使兩引之羨並歸無著此傅慶貽續詳時所  
已慮及者也至於已減之羨既經撥釐填補而未減之羨  
亦並藉釐塘塞撥一引之釐遂使一引之羨全歸無著此  
則傅慶貽所未慮及者也夫羨截固屬正供而釐銀亦關  
軍餉同一庫款原無彼此之分何必多此周折遂至得一  
亡十數年之內商欠羨截積至四十餘萬而減收之釐尚  
不在內鹽務積弊至於無處不壞向非奏改官運則此撥  
釐作羨之弊虧欠正款尙不知伊於胡底今計自開辦官  
運以來邊引稅羨均由官運總局核入成本照數徵收用  
符先課後鹽之意絲毫不能拖欠而邊引應納釐金又均  
涓滴歸公無復挪此填彼之弊一年之中一出一入挽回

正款不下十餘萬行之十年其數不下百十餘萬川省庫  
款盈絀卽此一端已可概見惟傅慶貽當日旣知撥釐之  
舉有礙正供並不據實更正停止以致虧欠羨釐各款如  
是之多實難置身事外現查咸豐元年起至同治十一年  
未經撥釐以前應收羨截欠款容查明官欠商欠引欠分  
別核追外至同治十一年三月初一日以後劃撥填羨之  
釐一十三萬有零至今無從還款積欠羨截三十九萬有  
零至今亦無從徵收據該司道等造冊會詳請核前來臣  
查傅慶貽創爲撥釐填羨之舉名爲撥釐實係挪釐名爲  
填羨實係減羨事後旣明知其誤又不急爲更正以致頻  
年羨釐兩項短收愈甚其貽誤要需傅慶貽實無可置辯

但此時若責令原辦商人每引補繳羨截二兩各州縣商  
人必以遵照鹽道從前定章辦理並非私自撥填爲詞藉  
口不補且事隔多年商人歇業死亡者亦復不少追呼似  
覺無益查上年官運一辦邊岸之挪抵早停現在清查已  
明計岸之挪抵亦從此永禁以後別無可作弊合無仰懇  
天恩准將各前道撥釐作羨之一十三萬八千八百四十  
餘兩照數開除毋庸飭令再補用恤商人其歷年積欠羨  
截銀兩仍由臣督飭新任鹽道另行設法催繳以重公項  
至傳慶貽辦事錯謬壞川省鹽法旣經該司道等查明具  
詳臣何敢因其已經升任代爲隱飾惟核其情節究與扶  
同商人作弊者實有區別可否懇

秀禾卷一  
恩從寬予以革職免議之處伏候

聖裁理合附片具奏伏乞

聖鑒謹

奏

清查鹽務妥議章程片

光緒五年十二月十九日

再查川省鹽務自道光三十年清查以後懸久弊生現存道屬各庫積滯水陸引張不下十萬餘道連各商已領未繳殘積各引共有一百餘萬道積欠羨截正款至一百四十餘萬兩鹽法之壞幾於無從稍救推原其弊約有二端一爲引目混淆查鹽法行引俱有定岸配鹽各有定廠界限極爲分明應完稅羨均須年清年款法令昭然川省自創爲改代改配之說以此岸之商代行彼岸之引又以彼岸之引改配此岸之鹽其初原因井水榮枯口岸衰旺數十年中時有遷移不能不酌盈劑虛由鹽道確查情形詳咨請改詎相沿日久流弊叢生鹽道衙門據商人一紙之

詞只圖多得改費絕不查廠鹽之盛衰商力之厚薄口岸之暢滯無不准改後並不行知各州縣督催亦不詳明總督查核以致蠹吏猾商因緣爲奸多將本岸額行正引置諸高閣而競改別岸之引或將本廠例配之鹽停積不配而競配別廠之鹽各處代行商人多係異縣隔籍不歸本岸地方官管轄改配之鹽朝東暮西變遷靡定漫無稽查州縣經徵稅羨雖有考成而苦於改代之案全無知覺及知之而呼應不靈提商不到奸商卽以虧欠不完之稅羨視爲固有之私利爭趨若薦愈准愈改愈少營私廢公漫無底止此弊之在引岸不清者也一爲款項繆轄查鹽法每引應徵之款曰課稅曰羨截課稅關繫最重處分

綦嚴而每引應完羨截銀數或多於正稅於是有所此商已  
繳羨截而州縣挪作彼商未繳課稅者有此縣已解羨截  
而鹽道挪抵他縣未解課稅造冊報部者有正商將引售  
與代商得銀以納課稅者有代商清完羨截而正商挪作  
課稅完繳者以致羨截一項名爲正款實同虛設概置諸  
不問用是日積月累遂成鉅欠鹽課大虧此弊之在款項  
不清者也現經臣督同司道悉心籌議善後章程六條嗣  
後發引必先新後舊不准新陳套搭徵稅必先課後引不  
准挪移虧欠收發鹽引責成鹽道不准假手吏胥改代引  
張責成州縣不容奸商朦混繳殘則嚴定期限以杜重照  
影射辦公則優給公費不准暗收陋規庶期身正則令自

行以爲務本清源之計至從前羨截之積欠實由額引之停滯現查未行積引多至數十萬張積欠羨截正款多至一百四十餘萬兩此時若將以前積引照例均作爲廢紙固屬簡截但積引不銷則羨截悉歸無著且商人因從前官吏皆以半利爲事引張可以妄發口岸可以混改於是始不惜花費乘便營私冀漁厚利今若將積引照例作爲廢紙則商人從前所用使費及其中有已完稅羨者爲數頗鉅雖花費係屬舞弊咎由自取無足深諭而稅羨空完賭累亦實可憫况此事皆由於官之營私廢公而後商人從而趨之弊在官而不在商情亦覺有可原又况積欠羨截正款亦應設法歸補而歸補之方銀數太多措置匪易

臣維歸補積欠舍帶銷積引無可措手蓋積引能銷則事  
欠各款亦有指望現擬酌議分年帶銷積引之法如未行  
積引從前有完稅課而拖欠羨截者卽免其再交稅課專  
收羨截如有稅羨均已全完而引張未行者則免其重完  
稅羨而專收廠釐總使積引不成廢紙而欠款可以收回  
商人可免賠累多銷引張一分則欠款亦可收回一分庶  
上可以彌庫儲之虧下可以救商人之困公私兩利莫過  
於此至各屬未繳殘引仍應照章勒限追繳俟繳齊之日  
確查實欠款目在官在商有著無著再爲分別追賠豁免  
毋許仍前含混似此事事核實雖不敢必異日永無弊端  
而目前急務實屬秩然不紊據清查局司道等妥擬章程

六條詳請奏咨前來臣詳加查核均屬周妥詳盡照繕清單附片具奏伏乞

聖鑒訓示飭部核議施行謹

奏

謹將川省酌議鹽務善後章程繕具清單恭呈

御覽

一每年行引宜先新後舊也查鹽法部頒引紙例應年清  
年款勒限繳殘乃川省向係寅年發商卯年行銷辰年繳  
殘而商人於本年新引又不全行輒以遠年積引參差套  
搭加以推代改配舊引未銷新引又至於是重照影射挖  
補字號夾私漏楚百弊叢生不惟各州縣無從清查卽各  
關卡亦難盤詰是因套搭而始混淆因混淆而愈形積滯  
因積滯而請展限因展限而益滋弊端鹽法敗壞莫此爲  
甚應請通飭各關卡將光緒五年以前推代改配之引一  
律截留申繳定自光緒六年始先行新引如某縣五年分

新引銷完尙可帶銷若干張卽由地方官具稟候鹽道查明該縣四年分積引札發帶銷四年積引銷完再發三年分積引三年積引銷完再發二年分積引以次遞推一律辦理如本縣並無積引或積引業已銷竣卽由鹽道查明附近州縣積滯較多之引札發帶銷仍按年遞推不准淆亂至本縣本年新引尙未銷竣者一概不准帶銷積引如此辦理庶可劃清界限斬斷葛藤一切弊端無從舞弄一州縣領引宜先課後引也查鹽法各州縣領引發商後卽應將經徵之課稅羨截歸數全完一屆奏銷查明未完分數分別參處定例綦嚴乃川省報部有名之正商無力自行大都將引岸轉佃行商議有岸租有月息有引底一

切應完稅羨等項仍由行商措交正商上納而正商又往  
往虧挪羨截僅繳正稅或並正稅不繳甚至無行商認岸  
正商卽將額引轉售他岸行商率請改代而於本岸招致  
私販挂秤抽釐即使守提追比而輒轉拖延迄難繳清又  
有正商稅羨全繳而州縣將此商所完羨截挪填彼商正  
稅以避處分有州縣稅羨全解而鹽道將此縣所解羨截  
撥填彼縣正稅以顧奏銷不獨羨截多無著落而款目亦  
極混淆以至厯年積欠至一百四十餘萬之多若不明定  
章程勢必愈積愈深不可收拾應請嗣後除官運官引兩  
局應行黔滇潼計各引應完課稅羨截現已由兩局隨引  
徵收報解外其餘各廳州縣應札飭於具文領引之前查

明應行水陸引若干張應徵引稅銀若干兩羨銀若干兩  
截銀若干兩硃力銀若干兩分別春秋兩季各共應繳若  
干兩先期傳集行商如數繳齊造具清冊隨領引之文批  
解鹽道如有永遠推出之引亦於冊內註明原額水陸引  
若干張推繳某縣若干張實行若干張應徵稅羨截銀  
若干兩分別兩季埽數全完如有永遠認銷之引亦於冊  
內註明原額水陸引若干張認銷某縣若干張共行若干  
張共應徵稅羨截銀若干兩分別兩季埽數全完由鹽道  
查核數目相符始將引紙給發承領回縣轉發行商如所  
解不能足額卽由鹽道查明欠解若干兩照數扣存引紙  
若干張仍飭速行批解到日再行補發如將屆奏銷尙未

掃數批解卽將引紙存留道庫作爲積引無庸再發照例開參如此辦理在行商旣不受坐商虧累而繳課時日又復寬展自必踴躍樂從不致延誤實足以順商情而顧鹽課

一收發引紙宜鄭重辦理也查四川通省每年額行水陸鹽引十六萬八千四百零七道戶部頒發鹽道由鹽道申送督署蓋用關防檄發道庫分飭各廳州縣具文請領發商行銷立法原極周密乃每歲部引頒到僅由鹽署書吏開摺清數往往抽匿正引捏報短數每束自一二張至八九張爲動用餘引補數地步又將抽出引紙夾入正引之中朦混過印並有挖補水陸字樣以餘引混作正引者而

邊旁字號挖補重複更不勝言及送督署鈐印時又不  
總彙送隨時或一二萬張或三四萬張陸續齎院亦僅有  
總數申文並無細數清冊至轉發各廳州縣又並未分晰  
造冊詳報是則某州某縣額引若干增引若干推出若干  
實發若干無從稽考卽有重發混發等弊猝難查出實非  
慎重鹽引之道應請奏明嗣後餘引停止不發其正引頒  
到嚴封存庫由鹽道詳請委明幹州縣數員督同鹽書挨  
捆細查是否足數取具切結備案如額引實有短少卽將  
確數稟由鹽道詳由督署發給關防大票按束填補卽時  
咨部立案日後繳殘卽照咨查考至歸丁引紙例應截存  
道庫卽由鹽道查明現在歸丁州縣若干處水陸引紙若

千張如數提出按縣編列字號存庫隨殘彙敍無庸送院  
鈐印其應送院鈐印之引卽由鹽道按照各廳州縣名編  
號由一號至十百千號止一總送印不准分爲數次並將  
某縣水陸引若干張係編爲某字號造具詳細清冊隨文  
申送至每年引張發竣卽由鹽道造具詳細清冊三本詳  
報督署查覈以官運行銷水陸引爲一冊截存歸丁水陸  
引爲一冊發商行銷水陸引爲一冊分別註明發訖截存  
字樣其發商冊內並須註明原額水陸引若干張增行水  
陸引若干張如遇永遠推認之引卽於推出縣分項下註  
明原額引若干張推繳某縣引若干張尙存若干張照數  
發訖並於認銷縣分項下註明原額引若干張認銷某縣

引若干張共計若干張照數發訖設有積滯未發縣分亦須逐縣分註並將發引月日按縣登記以爲督征張本如此分晰造冊不惟引張已否發竣總督衙門得有稽考卽有重發混發等弊亦立時可以查出無從掩飾庶足以昭慎重而杜弊端

一推代改配宜兼責州縣也查鹽法行引有定岸配鹽有定廠界限本自截然乃川省創爲推代改配之法本縣額引尙未全銷復認銷別縣之引而本縣之引轉多積滯本廠之鹽本足敷配復改配別廠之鹽而本廠之鹽遂致賣私廠困課懸率由於此然從前尙有限制自川鹽濟楚以來奸商紛紛請改富犍兩廠漏楚行私有指請認代某縣

之引改配者有預請改配某縣幾年之引者有改配後而又請減半納釐者有認代後而又轉售引紙射利者有年限已滿而又請一展再展者不獨各本廠有鹽無引私販充斥而各本岸亦多荒廢無商承認實屬不成事體應請嗣後除永遠認代奏咨有案外其餘各歸各岸不准改代如口岸實在疲滯每年只能銷引若干必須推出若干由各地方官據實稟候鹽道查明附近行銷暢旺額引全完之州縣飭發代銷如口岸暢旺本縣額引全完又無從前積引必須代銷別縣之引若干始能接濟民食亦由各地方官據實稟候鹽道查明附近州縣積滯之引飭發代銷概不准任聽該商等自行指明縣分呈請推代認銷並須

年清年款不准展限卽有各商自願呈認代銷別岸亦必由鹽道先行飭查該州縣是否全無積引是否暢銷再行詳明批准認代仍將該商呈請緣由並領到引張若干數行知該州縣查照定限一年內銷竣繳回殘引如逾限不繳殘或繳不足數卽惟該州縣是問至於改配相沿已久若驟令各歸原廠或恐民間食慣一時未能禁絕而水陸運道亦實有距岸紓遠各商轉運甚艱應於限制之中示以體恤除健廠產鹽僅敷官運採購奏明川東下游州縣不准改配外其餘責成各有廠州縣悉心確查所產之鹽如配運有餘卽飭原行各縣之引仍照舊歸還原廠不准擅改如實係井老水枯鹽不敷配或原行某縣運道艱難

應改附近別廠卽由該廠地方官先行稟明每年產鹽若干配引若干不敷若干應改若干飭委廉明之員覆加確查會稟立案以後改配卽以此案爲率儻原稟鹽不敷配而該廠私鹽仍復充斥則是有心徇隱卽將印委各員分別參處至各商請改仍由鹽道查明附近產鹽較旺之廠批令改配不准該商等自行指廠以維鹽法而紓廠岸

一追繳殘引宜各專責成也查鹽法銷引繳殘例有奏銷期限不得逾年乃川省各商有准展至來年奏銷前者亦有展至來年奏銷後六八十月及十一十二月不等者限期旣無一定且一展之後復准再展該商等有恃不恐或將積引重價轉售以爲漏楚之需或將殘引設法重配以

爲影射之具推原其故皆緣推代改配向於鹽道交替時各商串通家丁私相授受行知文件概交商手地方官既不得知而鹽道衙門亦無案據而且旣改代又套搭旣套搭復展限甚至將引作貨抵押當賣輒轉交易竟不知引落誰手不惟引紙已行未行漫無查考卽稅羨已完未完亦漫無著落應請嗣後各計岸額引照例於奏銷報完後扣限半年由各州縣追繳殘引永違不准展限至改配推代旣定由各州縣稟准鹽道承領轉發不准各商私相授受立有案據各地方官卽不得藉口推諉改配之引仍責成本縣地方官追繳改代之引卽責成代銷縣分地方官追繳均以八個月爲限一律辦理逾限不繳無論已行未

行一概作爲廢紙嚴飭各廠關隨時查明扣留申繳並將承追不力之地方官分別參處以儆玩延如此辦理則各引先有著落已行未行已繳未繳均不難於稽查不致仍前混淆重影射推諉貽誤

一鹽道衙門宜優給公費也查從前鹽道衙門領引有費繳殘有費推代改配展限有費種種需索猾商蠹吏因緣爲奸鹽法紊亂幾至不可收拾職此之故然若一概裁革則鹽道公務較繁不惟辦公無資卽圖署書役亦不能責其枵腹從事自應酌定優給公費以資津貼庶免弊竇別開查川省向來各商領引其正用使費本屬無多應仍其舊惟實不敷辦公若酌量加增取盈於商不獨有拂商情

亦且無此政體應於本省籌備辦公項下酌量優給鹽道署作爲辦公經費至各州縣請領帶銷積引每水引一張應照現在官引局章程辦理隨文呈解鹽署以資津貼此外一切不經名目概行永遠禁革不得格外需索分釐庶鹽道衙門辦公有資而成法可期永遠遵守

遵 旨明白回奏摺

光緒五年十二月二十日

奏爲參辦革員事後挾嫌捏控遵  
旨明白回奏恭摺仰祈

聖鑒事竊臣接准都察院咨光緒五年七月二十九日奉  
上諭都察院奏據已革四川候補同知宋大奎遣抱赴該  
衙門呈訴被參冤抑等款除事不干已照例不行各節外  
該革員所控前於署名山縣任內交代未清同案被參者  
十二員丁寶楨獨將該革員押赴司監皆由奏請迴避盤  
踞省城之知縣丁道良從中播弄所致又以該革員有教  
令職員王余照用銀賄串言官吳鎮情事委員將該革員  
守提解省實屬冤抑等語著丁寶楨據實明白回奏抱告

家丁黃玉該部照例解往備質欽此欽遵並鈔錄原呈暨  
甘結各一紙咨行到川臣查川省宦場習氣之惡甲於天  
下該革員宋大奎呈控各節臣原不難縷晰陳明以折刁  
狡之心而杜讒慝之口惟既蒙

聖明洞鑒照例不行臣亦何庸瑣瀆謹遵

聖訓所指據實爲

皇太后

皇上詳陳之查

臣於光緒三年三月到蜀後卽聞候補同

知宋大奎狡詐惡劣爲川省最不安分之員其時卽擬奏

參正在詳查閒適臣

因四川省州縣多有虧空嚴定章程飭

查通省交代卽據藩臬兩司先後詳陳宋大奎於光緒二

年代辦名山縣任內虧挪津貼銀六千一百八十三兩零  
又欠解是年地丁銀七百四十二兩零屢催不繳臣以津  
貼一款係因軍餉緊迫爲

國家萬不得已藉資民力之舉宋大奎竟虧挪至六千數  
百兩之多實較之虧挪丁糧尤爲喪心昧良卽經特參奉  
旨將該員卽行革職飭司勒限嚴追乃逾限日久仍抗延  
不完又據司詳奏將該革員拏問監追並咨行寓所原籍  
查抄貲財家產備抵奉

旨允准各在案是該革員拏問監追係照例辦理之件卽  
臣參辦該革員亦係特參虧挪並未涉及他事且經由司  
具詳固不待於人之播弄者也至其所控丁道良一員係

四川新班遇缺先卽補知縣臣之總麻族姪孫臣到川後卽照例奏請迴避因其在川年久積累較多一時未能起行而臣又實無力資助困守省垣貧窘日甚並不出入衙署常來謁見此通省所共知該革員指爲盤踞實覺無因至稱丁道良挾有仇隙其原呈並未指實明確此則訊無從訊質無可質其捏詞誣控不待辯而自明者也又如所控臣以該革員有教令王余照賄串言官吳鎮情事委員將其提省一節查拏問監追官犯應行監禁定例昭垂於拏問各革員均係於奉

旨後遵例札行兩司將該革員等監禁查究嚴追完繳迨四年三月藩臬兩司具詳該革員已經潛逃無蹤等情當

經飛咨原籍並通飭各屬一體嚴拏務獲解審厥後臣被言官參劾奉

派恩承等來川查辦而言官原參各款川省已早經傳誦臣以蜀地多謠街談巷議無足深信迨恩承等於臘月下旬到川所查事件與川省所傳參款無不脗合蜀中官民頗多驚訝適有自流井職員李春霖等以竈商王余照恃富橫霸把持公事魚肉井廠多養棍徒交通京外等情赴臣衙門具控經接呈委員據呈堂訊據供稱王余照因臣開辦黔邊鹽務不遂其私因與黨友串謀措寄鉅資致信京官奏撤官運並參撤唐炯等語詰以黨友何人則云有宋師爺大奎文師爺子澍羅信修王懷亭等多人並云宋

大奎係貴州人前曾署過名山等縣原供具在有案可稽  
臣以宋大奎係拏問監追日久在逃之犯其有無教令王  
余照賄串言官情事一面之詞不必深究第其虧挪津糧  
甚鉅且係奏明拏問監追在逃通緝今既有此下落自應  
查拏懲辦隨卽委員並檄飭富順縣前往自流井鹽廠確  
查果將該革員在彼拏獲解省發司監追在案竊惟宋大  
奎係虧空在逃之犯緝拏監禁係照例應辦之事乃絕無  
忌憚竟敢憑空砌控冀圖領陷且將事不干己之件瀆呈  
聳聽刁狡已極查向來川省官場其平時牟利營私無所  
不至迨上司欲加參劾輒思藉端挾制風氣敗壞紀綱埽  
地從前督藩無不深惡宋大奎之爲人然皆憚其任意挾

制隱忍縱弛不遽參劾臣力矯積習以除官蠹乃該革員  
於在逃拏獲之後輒敢挾嫌捏污似此藐玩若竟置之不  
議恐逞刁之徒從此相率效尤益將目無法紀宋大奎係  
照例監禁之犯尚有追繳之款其挾嫌捏控應否治以應  
得之罪以儆貪狡而肅紀綱之處伏候

聖裁所有遵

旨明白回奏緣由理合恭摺具陳伏乞

皇太后

皇上聖鑒訓示謹

奏

憑陳辦事竭蹶情形片

光緒五年十二月二十日

再密陳者竊宋大奎捏

臣

以該革員曾教令王余照賄串

言官輒將其提省監禁一案

臣

已據實具奏惟思該革員

所以如此捏控者其用意在使臺諫與

臣

有不能並立之

勢用心可謂狡極查四川官方之壞綱蔽已深實非一朝

一夕之故各衙門苞苴之盛本爲他省所未有州縣剝民

以媚上刁紳結官以分肥上下交征遂至互相劫脅道揆

法守蕩焉無存州縣終年不理案件不講緝捕政以賄成

盜賊充斥民間生意憔悴終歲勤動禦寒幾無寸縷充飢

不厭糠粃失職無告之民盈溢街巷患氣已萌可爲隱慮

臣自到任以來晝夜焦思設法整頓州縣漸知畏法亦頗

講求辦事外面似已改觀而隱微深鋼之習中於人心則  
仍牢不可拔似非微臣薄德所能轉移變化臣竊見川省

民生困苦經費支綽到任之後首裁撤各州縣夫馬以恤  
民而固根本繼革除各衙門陋規以恤吏而杜貪婪又裁  
減各處釐金清釐虧挪以裕庫儲而供支撥又收回鹽務  
自然之大利以爲他年漸裁本省常年捐輸之漸此皆官  
紳所不便怨謗所由起蓋川省各上官無不食滿堂紅陋  
規之利其利悉取於州縣而州縣則又悉取之於夫馬局  
州縣取之夫馬局則又必勾結紳士以脅制鄉愚而阻其  
控告而鹽務一端王余照私抽堰釐井釐各款井廠之利  
攘奪刻剝咸謂盡係借名抽收以供京師各處之用是川

省自上司至州縣劣紳無不攘利分肥上下交病微臣收回鹽務中飽之利百餘萬歷經奏報在案革除將軍總督兩司道府各衙門陋規六七十萬而無名之餽獻不在此數裁撤各州縣夫馬雜派一百六七十萬而無形之勒索不在此數統計數端凡上還之

國下還之民約在三四百萬以外此皆閩省官紳厯年固有之利微臣只知有公而不敢徇私盡數釐革稍昧古人水清無魚之戒凡與臣有平生之雅者無不貽書勸諫爲臣悚懼臣亦自愧非負重之器知終顛踣然終不敢昧初心以負

國而病民乃

秀禾卷一  
聖慈矜憫雖微臣疊干吏議而

如天之仁苦心庇護曲爲解釋

訓誨殷拳無微不至四海以內莫不爲臣榮幸以爲同戴

高天而微臣獨蒙被

恩眷至此實爲今古之所希有然

朝廷庇

臣愈深入情族

臣愈甚蓋緣鹽務夫馬陋規三大

端盡奪官紳之利仇怨已不可復解

臣初莅任時四川京

官至有函請

微臣代催規費之事及初議開辦鹽務復有

京員馳書勸沮此議並

臣前在京都時川人又有以竈商

王余照託

臣任用及上年春夏之間聞

臣有查辦該商之

意復有函託

臣之幕友僚屬請其向

臣關說臣旣一切拒

絕積釁甚深川省與京師瞬息相通言官摺稿外閒輒能傳誦其情狀如何自在

聖明洞鑒之中疆臣以持守大體尊

主庇民爲職若憑外閒傳諭許發陰私以快睚眦之宿怨必開攻訐之風啟朋黨之漸非獨微臣不敢輕爲禍首蠟

蟻愚忱並願

朝廷默運機宜預消隱患臣受

恩深重未能圖報雖隕身碎骨亦不敢稍自顧惜但此中辦事竭蹶情形實不敢不懾陳於

聖主之前查本年正月以來浮議孔多所有微臣經手事件幾至一切察壞非獨鹽務一端而已臣悉力維持顧此

失彼僚吏存觀望之心公事多牽掣之勢雖

朝廷任

臣

至專責

臣

至厚

臣

尙動形棘手神智俱困卽如

川東教案早經一切了結民教相安而夏秋以後奸民思

爲斂錢之計輒復煽眾滋事焚燬教民租房幾有翻動舊

案之勢現在尙擬議賠了結又成都各屬盜風最熾自

到任卽痛加懲辦後三年四年各屬劫盜幾於絕迹據本

年秋冬間各州縣稟報劫案雖不至如往年之甚較之前

二年安靜光景則已覺不及此皆早經辦有頭緒至此忽

漸形費手蓋蜀中官民皆以

徵

臣

風棱摧挫不復可慮州

縣懈弛於上刁民煽動於下人情靡定事故環生此皆與

臺諫彈劾各端絕不干涉而無形之中已覺波濤疊起應

接不暇以後若再有利國利民之事必須創建深恐成效未睹先貽口實竊思古人之義或與臺諫不和則有乞身引退以避其鋒臣不敢蹈此悻悻小節背

君父之厚恩亦不敢畏避謗讟平生之素志仍當殫竭血忱終始不懈他人排陷百端本非以

國事爲意伏維

聖明俯賜主持隱戢黨援攻訐之習不任企悚屏營之至近蒙

恩諭以規復淮岸引地責成一手經理查黔邊鹽務上半  
年幾致決裂自欽奉

諭旨以後商情既定銷路大暢本年行運各引幾與上年  
相等明春二月奏銷到部即可考核此已非意料所及現  
在復准讓楚機勢漸成俟趕辦奏銷後再行妥議具奏惟  
非常之原黎民所懼川省紳商必且巧搆訛言陰沮其事  
不勝愧惻所有微臣歷年辦事本末並近來竭蹶情形謹  
附片密陳伏乞

聖鑒訓示謹

奏

都江堰歲修親往查驗片

光緒五年十二月二十日

再查都江堰自康熙以來卽定有歲修分內外江先後辦理每年於十一月水涸時先修外江卽將外江之水全數閘入內江定期於十二月中修理完竣又將內江之水全數閘入外江定期於次年二月清明前後十日內完竣然後起閘放水分入內外兩江其放水分數內江定爲六分外江定爲四分係以江中所修分水魚觜爲權衡至所謂人字隄者長僅一百二十丈其隄身壁立水中春時則全資以得力至夏秋閒則不甚喫緊蓋因三四月內江水尙未漲發內江每患水少故以此隄攔截內江之水使不至溢入外江至五六七月江水大漲內江不能容納則必須

任其漫過隄頂洩出外江而後內江不致泛濫故人字隄一段向來均用竹編成長籠裝石堆砌其間高低尺寸均有一定光緒三年陸葆德等易籠石爲砌石者殆見此段隄身屹立江中以籠石堆砌歷年一經漲發後竹卽朽敗不堪禦水冬令必須全行折修因與該處紳民等商擬改籠石爲砌石期於經久可免年年折修稍節公費嗣經次年江水大漲砌石之法不若籠石之宣洩合宜卽於是年冬月自備經費仍將所砌石隄全行折盡照舊改爲籠石堆砌旣改爲籠石堆砌則此後仍須照前年年折修方可無誤而內外江江心於光緒三年大修後已經兩年盛漲江水來源甚勇挾沙而下不無淤積處所亦應照前將河

底逐段查看辦理以免愈積愈甚用資久遠現在正值歲修外江之時臣以此兩年內江流極順若再於歲修時督飭水利同知切實辦理則卽此雍道年間所定歲修之款儘足敷用萬不至如同治二三年以後辦法費日加增江日漫溢爲害農田臣因都江堰距省不遠因於十二月初二日親行前往查看該水利同知歲修外江之工將次竣事辦理尙爲結實當飭於十五日趕將內江之水放出外江修理內江定於明春二月中放水分入內外兩江以資農田播種之用約計內江歲修之工明春二月初旬即可完竣屆時或由臣親往查驗或委員前往查驗再爲陳奏至內外江分水定制本係外四內六而歷來盛漲時究未

能恰如分際

臣年來推求其故並委員會同水利同知再

四詳度地形始覺江水來源處有白馬槽一道其地勢甚長將江流倒阻致溜勢偏趨右路復將其形勢與分水魚

觜詳加測量似亦將魚觜遮攔過半以致分水不能適中

故江水下流內江易致偏重

臣詳審形勢確切不易已飭

令該同知將白馬槽一處挑去十八丈有零此次前往查

看甚覺直截得力復沿河徧詢老農均稱妥協且謂此次

歲修工程明年江水卽有大漲儘足以資抵禦無虞橫溢

查江水之利害農民實所身受且其居處田畝多在江干

於水利尤爲關心儻辦理稍有不合卽相率攔阻現在都

江堰工各屬鄉農尙無異議臣以此差可自信其他則非

所敢知也所有都江堰辦理歲修工程臣出省親往查看各情形謹附片具陳伏乞

聖鑒訓示謹

奏

接收伊犁敬陳管見摺

光緒六年正月十九日

奏爲接收伊犁事體關繫安危甚大謹就微臣愚見所及據實直陳恭摺仰祈

聖鑒事竊臣前得之傳聞以俄人退還伊犁一事均謂出使大臣崇厚與該國議明通商各款中國失利甚大貽害甚遠現在多有議駁等情蜀中距京太遠臣未得其詳細無從探悉然以此事既允復翻關繫極重未可輕率用事日夕焦思至忘寢食嗣接閱邸鈔欽奉

上諭將崇厚所議條約章程及總理衙門歷次所奏各摺件著大學士六部九卿翰詹科道妥議具奏又以何金壽奏請推廣會議人員奉

上諭所有此次會議事件中外臣工如有所見自行具摺據實直陳欽此臣愈以揣知此中事機必有難於措置者是以上煩

宸廬若斯之甚也

臣

自維受

國厚恩當此時勢萬難

宵旰憂勞之日若以事非已責緘默自容中心實有所不安然第託諸空言無裨實事而有誤大局則仍無以上解君父之憂居心更不堪自問日來傍徨中夜有不得不越分而懸陳其愚者竊維俄人恃其富強虎視鷹覬憑陵中國其事已非一端從前該國占據伊犁以情事而論曲本在彼中國念切睦鄰不惟不責其乘亂攫取之陰謀而

特派大臣前往與之從容議論歸還疆土且償以兵費實爲仁至義盡乃俄人貪饕無義慾壑難盈而崇厚忽於一時未能通顧大局力持定見且怵於俄之勢力但冀爲國家求目前之粗安而頓忘後事之隱患誠爲可惜然此時事機已成亟應慎密圖維爲補牢之計未可再事輕忽也查此時之事所議者不外准駁兩端而現在議准議駁均有爲難者議准則俄人大獲所欲自可暫安於目前而定界則得隴望蜀通商則華俄不分日後之爲害實大況各國和約均定有同霑利益之條今見俄人獲利甚厚覬覦效尤實在意中此議准之難也議駁則俄人必責我以背約背約之事外洋所重俄方以大國雄視泰西今以已

成之局忽焉中變心既不甘而又恐貽笑於外洋勢必臨  
我以兵力圖挾制卽各國見利必赴亦將以失信在我陰  
煽俄人以與我爲難希冀事成而坐收漁人之利此議駭  
之難也又或議以整飭防務爲戰爭之地者所論誠爲正  
大然俄人自恃强大脅之以兵勢恐難俯就牢籠旣不就  
我牢籠則兵端必開夫兵端開而僅在西路則現在之防  
猶可謂有備也臣竊計俄之與我爲難者將來恐不在西  
路而全在東北則黑龍江以東沿海之防較之西路尤形  
喫勁自須卽時籌備而值此兵餉兩缺驟興萬里之防究  
將從何著手又况此時布防亦有緩不濟急之勢此又議  
戰之難也又有議以籌兵練餉爲自固之計者亦屬正論

然只可爲事後之緩圖非所語於目前之急務也現在諸臣籌議若何臣不得而知特以情事度之大約所主者惟議駁與備禦兩途耳特議駁則我有負約之名備禦則東北之防全虛時勢至此一舉一動亟宜精密而出非可以空言得力也臣愚謂爲今之計無論議駁議戰均須求一實在辦理之法而後事乃有濟且議駁則戰卽因之亦勢所必然尤須先爲騰挪時日而後戰事可次第興辦大要在於此時先擇一二眞能任事之人置死生禍福於度外者再履俄人之庭與之重申前言設法辯論惟俄現責我以背盟其氣甚怒使臣一入俄境勢將拒而不納要不爲其所屈而發端務審夫機宜及其與俄官會議議而不合

俄必以威相脅要不爲其所憾而持論益務爲堅忍又察其平日之舉動以與爲周旋審其臨事之機變以相爲因應但能虛與委蛇強忍力爭百折彌固彼俄人旣以大國自居或且顧惜名義而可期轉圜如稍得有轉機能將崇厚所與議定各條爭得一分中國卽有一分之益而國體與全局亦不至大虧至於敵情莫測使臣雖强爲辯論期於有濟萬一俄人堅執不回亦可乘此餘隙將內地東北沿海一帶防務妥籌速辦庶期計出萬全不駟至於倉卒坐困一誤而復再誤也夫以我二三忠誠効命之人飲恨椎心出而爲

國家設官養士二百數十年值此事勢危迫之秋自必有

朝廷分憂任患者伏惟

皇上慎重遴選急於任使不可再事遷移駢至事愈久而變愈多以後更難措辦儻一時或無其人則事變當前豈容坐視臣本極庸劣何足仔肩大事然受

恩深重理難自全蠟蟻愚忱竊願以犬馬微軀一登俄人之堂稍効涓埃之報臣在川三年諸事已漸就理卽鹽

務責任較重現屆二次奏銷臣日來查核銷數甚暢除邊

計額引全銷外帶銷積引已及八成卽滇岸數十年額引不行之地本年辦理甫閱十月額引亦已全銷轉瞬奏銷到部自可一覽而知查看此時情形已成復淮之局是鹽務一事局勢已定以後但能堅持定見專任唐炯再爲經

理一二年不令局外旁撓自必益臻完密  
臣此外並無未完事件正可及時報効惟願

聖明及早定議現在內有總理衙門相爲維持外有直隸陝甘各督臣相爲策應而臣憑此一身剛柔並用與之周旋以冀顧全大局不令遽啟兵端但能上紓

主憂雖萬死亦何所惜區區之愚如蒙

俯允一俟奉到

諭旨臣卽星馳北上與總理衙門王大臣及直隸督臣妥

商辦法卽行起程以速事機不容稍涉遲延所有具陳接收伊犁事宜緣由是否有當謹由驛四百里馳奏伏乞

皇太后

皇上聖鑒訓示謹

奏

籌款解直募勇片

光緒六年二月初一日

再接收伊犁一事臣已謹就管見據實具陳惟思崇厚所議各條多不能准而俄人恃強一經議駁恐啟兵端必然之事臣前摺所陳請再行遣使前往與之重申辯論亦冀據理力爭或可將前議挽回一二以全大局不令遽啟兵端如萬有不濟與之言戰則可借此爲緩兵之計以布東北之防護衛

京畿俾免臨事倉卒庶幾計出萬全此臣之用意也第此時東北之防遠近約數千里兵餉籌措匪易卽撥之各省亦恐曠日需時臣之愚見擬請遴派誠實將弁先行在直東一帶選募精壯勇丁五六千人就直東交界處駐紮操

練以備緩急其五六千人之餉約計一年必需銀三十萬  
上下臣擬卽由川省籌撥解濟期於布置一處卽得一處  
之益惟募兵一層若由臣自川遴派將弁前來恐其距臣  
太遠督查不能周到擬請將此項餉銀撥解直隸督臣李  
鴻章查收由李鴻章揀委將弁妥爲招募卽就近駐紮天  
津一帶操練則督飭較嚴稽查較密數月之後可期得力  
以助一臂且於京師聲勢亦壯但此項餉銀川省司庫協  
撥過多亦難籌措現在官運局鹽務銷數甚暢收數亦多  
臣擬將此項餉銀卽專由該局撥解接濟無庸再向司庫  
籌撥庶可各路兼顧如蒙  
俞允臣卽趕緊照辦並請

勅下直隸督臣李鴻章迅速查照辦理臣爲謀定後動起見是否有當謹附片具奏伏乞

聖鑒訓示謹

奏

川鹽濟楚請減引辦理片

光緒六年二月初一日

再從前疊准部咨飭禁川鹽濟楚規復淮岸臣自到任後復疊次接准咨催照辦在案其時以川省應行之滇黔兩省邊岸軍興後荒廢多年川鹽賴濟楚始有出路而川鄂兩省抽收鹽釐實爲饑源鉅款若不求川鹽出銷之路並籌寄鄂省應支之餉卽議停止不惟商情不順且坐失自然之利於

國計民生關係實非淺鮮然復淮終屬舊制萬不能因循中輒惟欲復淮必先開本省邊岸使川鹽有路可行商竈不至坐困庶辦理始能允協是以到任之時卽先擬規復本省滇黔兩岸以爲停楚復淮地步奈川省鹽綱墮壞已

數十年若仍積習相沿終無成效再四思維惟有仿照雍正年間川省官運商銷成法於光緒三年酌擬章程具奏各部議復照辦荷蒙

諭允於溫州設立總局委道員唐炯綜理其事因帑本短缺僅得先辦黔邊一岸仰賴

至主福庄開辦後鋪鹽頗暢額引全完並帶銷積引徵收稅羨穢釐各款著有成效四年續經奏准接辦滇邊迄今兩次奏銷行引俱能足額各處口岸亦漸次開通各廠鹽勦均漸有銷路此時若議停楚復淮在川省已可照辦惟念川鄂脣齒相依鄂省自川鹽入楚每年抽釐百數十萬兩實爲餉需大宗川鹽一停此項卽歸烏有而應行協撥

各款爲數甚多究從何出是欲停川鹽不能不亟爲鄂省  
餉源計而後可彼此兼顧不致貽誤大局擬請

飭下部

臣及兩江督

臣

議定每年撥解鄂省有著之款一

百二三十萬兩俾其支撥稍舒不致短絀然後川淮引鹽  
始得各歸各岸復還舊制以全三省之利如以議撥鄂餉  
不能如數抑或所撥之款不能坐實則川鹽自未便驟停  
致礙鄂省餉需查上年前兩江督臣沈葆楨以濟楚如不  
能遽停擬由川省酌定行引數目以示限制函商之臣  
以現在開辦黔滇兩岸卽是歸還淮岸地步所商酌定行  
銷引數以示限制係屬釜底抽薪之法應可照行今若部  
臣及兩江督臣因籌撥鄂餉一時不能應手則鄂餉無出

川鹽自未便卽停似可查照沈葆楨所議酌定引數行銷之法每年川鹽濟楚准令行引入九千道以示定限不得逾額俟鄂饑議有實款後再行全數復還庶三省均可兼顧而鄂饑得有實濟復淮之說自不致徒託空言臣爲統籌三省全局起見應請

旨飭部議覆施行伏乞

聖鑒訓示謹

奏

官引票釐局戊寅綱徵收豐旺片

光緒六年二月初一日

再據滇黔官運局建昌道唐炯詳稱該局曾於光緒五年正月間將富順犍爲各縣自三年十一月改辦官引票釐各局起至四年十一月底止一年期滿比較從前銷引甚多收釐倍旺詳蒙具奏茲查自光緒四年十二月接辦起截至五年十二月十九日封篆日止又屆一年期滿應將各局徵收引釐票釐各數目比較上年有無盈絀以昭核實迭據各局按月冊報自四年十二月起至五年十二月十九日止富榮官引局共行潼水引一萬六千四百七張共收釐銀二十九萬五千三百二十六兩又行計岸水陸各引折合水引三千六百零二張五則二色共收釐銀六

萬四千八百六十三兩三錢六分兩共收過引釐銀三十  
六萬一百八十九兩三錢六分又帶收滙引稅羨截銀一  
十四萬三千二百兩零總共收銀五十萬三千三百八十一  
九兩有奇比較四年分徵收引釐及帶收稅羨截共銀三  
十七萬五千二十餘兩計多收一十二萬八千三百六十  
餘兩鍵樂官引局共行水引三千六百五十八張陸引一  
萬七千六百三十九張共收引釐銀九萬一千二百四十  
四兩一錢六分比較四年分收數相去不遠渝城鹽釐局  
自五年正月初四日開閑起至十二月十九日止共驗過  
潼水引一萬三千九百七十七張又代銷水引四百八十  
一張陸引一千四百五張又各計岸水引三千六百四十

九張陸引六千一百六十九張共收釐銀三十六萬四千七百一十七兩零比較四年分收釐銀三十四萬二千零八十餘兩計多收銀二萬二千六百三十餘兩統計三局共收銀九十五萬九千三百五十兩零加以官運局徵收黔滇邊計廠渝銀四十七萬七千一百五十三兩六錢五分總共收銀一百四十三萬五千五百零三兩六錢五分零不特較未辦官運以前通省釐數幾至加倍卽較四年分核實抽收亦多收二十餘萬兩之譜現在停積潼引業已銷竣臣擬令以次行銷歷年計引實爲成效倍著又查富榮票釐局接辦一年期滿共收鹽釐九七市平銀十二萬六千八百零二兩二錢零比較四年分收銀九萬五千

五百六十三兩計多收銀三萬一千二百三十九兩零健樂票釐局共收釐銀六萬一千八百九十六兩零比較四年分收銀五萬七千五百餘兩計多收銀四千三百餘兩等情由該局會同鹽茶道崧蕃詳請具奏前來臣覆加考覈無異至官引各局原由鹽道委員經理其銀兩係全數解交鹽道庫兌收撥解藩司以供年中協撥各餉之用臣上年因力求考核復飭令各局員將收數按月分報官運局與鹽道互相較核以昭確實其票釐局抽收釐銀前因三年初開辦官運時鹽本一時不能湊集而局已開辦購鹽發運腳費無出且井廠易錢較難乃令該局將每月零星所收釐錢暫行撥解接濟運費曾經上年明晰奏咨有

案現在官運局兩年以來徵收正雜甚多鹽本運費足資周轉現據道員唐炯詳稱於本年二月起卽將此項借撥運費之票釐銀兩陸續分起如數解還道庫聽候撥用以免移轉理合附片縷悉具陳伏乞

聖鑒謹

奏

滇黔官運戊寅綱行銷引數經徵各款摺

光緒六年

二月初十日

奏爲滇黔官運局行銷戊寅綱邊計各引均已足額並帶銷積引數目經徵稅羨截釐一律全完恭摺仰祈

聖鑒事竊

臣據滇黔官運局建昌道唐炯詳稱該局於光

緒三年冬間開辦黔邊及近黔十三廳州縣計岸官運鹽務前已將丁丑綱行銷額積引數經徵款目分晰造報詳請奏銷五年正月復兼辦滇邊及近滇十二廳州縣計岸鹽務並將附近黔邊之巴縣江北廳計岸提歸官運併入黔邊局戊寅綱辦理查五年正月開運之初適值

欽差來川查辦民間哄傳官運將停商情疑阻不獨滇邊

初開之岸商人畏累不前卽黔邊已開之岸各商亦相率  
畏懼不肯領銷而地方官又乘閒陰爲阻撓是以各岸鹽  
觔一概停積是年春夏兩季半年之內幾至一引不行雖  
經各委員百計頻催商人無有應者不得已始將滯銷實  
情詳請具奏仰蒙

聖明洞鑒自六月後欽奉

諭旨仍飭辦理官運羣疑洞釋各商始踴躍領銷自七月  
後銷行日暢黔邊自四年十二月十六日起截至五年十  
二月十五日止應行邊計額水引一萬四千零三十五道  
陸引一萬三千一百六十一道均已銷竣並帶銷積水引  
六千九百二十五道陸引一百二道滇邊自五年正月初

一日開辦起截至十二月十五日止應行邊額陸引二萬  
五千一百五十四道計額陸引一萬三百四十五道水引  
一千一百五十一道俱已銷竣並帶銷積陸引二百五十  
一道以上各引應徵稅羨截銀二十一萬三千一百三十  
一兩零應收各廠局邊計引釐銀四十七萬六千一百五  
十三兩零又代收黔釐護本引底防邊勇糧餉驗局費等  
雜款銀五十一萬零二十四兩有奇統共徵收正雜各銀  
一百一十九萬九千三百餘兩一律全完無欠伏查滇邊  
額引自道光以後從未能按年全數行銷歷年積滯引數  
甚鉅今甫試辦官運卽將全年額引銷竣實非始念所及  
本應遵照奏限截至本年二月十五日扣滿一年再行造

報因滇黔兩岸統歸一局若分兩次奏銷不獨案牘紛繁亦恐款目輶輶是以提前兩月截至五年十二月十五日隨同黔邊官運鹽務併案造報以便稽核而省煩瀆應請奏明立案嗣後滇黔兩岸官運鹽務照戊寅綱奏銷限期一律辦理等情會同鹽茶道崧蕃詳請具奏前來

臣查黔

邊官運局辦理戊寅綱邊計鹽務實因上年春夏兩季甫經開運民間卽哄傳停止官運商情疑畏不肯領銷大局岌岌可危臣萬分焦急幸六月初商情始定七月以後引銷日暢核計半年之內除邊計額引銷竣帶銷積引尚及五成殊非意料所敢及至滇邊鹽務廢弛已逾二十餘年私販充斥幾成棄岸一旦規復舊制本屬萬難遠近傳言

官運諸多不便各商人徘徊觀望裹足不前自正月開辦起至五月杪局報銷引寥寥方慮額引萬難全竣幸於六月初奉

旨令臣悉心經理勿以浮言而滋疑懼等因臣卽恭錄出示徧貼曉諭從此商情鼓舞踴躍領銷合計行銷僅及半年不但黔滇兩岸全綱額引全銷尙能帶銷積引至七千餘道若非春夏兩季訛言淆阻則帶銷積引必較丁丑綱爲多自可概見此皆仰賴

聖主乾綱獨運洞燭機宜臣等得以上秉

宸謨遵循辦理俾得藉收成效實不勝欽感忻幸之至至滇黔兩岸合計戊寅綱共銷邊計水陸額引六萬三千八

百四十六道又銷水陸積引七千二百七十八道該局請一律截至五年十二月十五日止併案造報係爲便於稽核起見應請

勅下部臣查照立案除俟該局造齊清冊由臣另行奏疏題銷外所有戊寅綱滇黔兩岸官運銷引總數及經徵正雜各款銀數理合先行繕摺附驛具奏並分繕引數銀數暨經徵委員銜名清單恭呈

御覽伏乞

皇太后

皇上聖鑒訓示謹

奏

保舉人才堪備任使摺

光緒六年二月十九日

奏爲遵

旨保薦人才敬舉所知據實具陳恭摺仰祈

聖鑒事竊

臣

接准吏部咨開光緒五年八月初八日欽奉

上諭前因時事多艱需才孔亟疊經諭令各直省督撫隨時保薦人才以備錄用現在所舉各員量材授任者頗不乏人第聞見難周尙未盡登薦剝頻年講求吏治經武整軍各該省文武厯練旣深必多堪備任使者著各直省大吏加意訪求秉公保奏候旨錄用欽此

臣

跪讀之下仰見

皇上求才若渴惟恐遺賢至意莫名欽服竊維

國家設官分職首重得人人才者國之寶也第天之生才

也甚難而人之成才也亦不易或操行謹篤而幹濟未見宏通或條理精詳而猷爲未能開展或優於處常而難期其應變或務於精細而難任以重遠一德之長庸或多有兼全之詣所在難求現值時勢多艱自非得明體達用爲守兼優之品不足以宏遠謨而光郅治臣謬任封圻與士大夫相接者眾每於特行之士旣詳考其品詣復密審其才猷十餘年來所爲私心佩服者不過數人謹開具清單列其行誼登之薦牘用候

簡拔以期仰副

聖主旁求俊彥之至意所有遵

旨保薦人才敬舉所知緣由謹恭摺具奏伏乞

該員治理通達心術正大清操自勵守正不阿在龍安府任多年正值崇尚侈靡公事廢弛之時獨能講求吏治不  
少遷就現署成都府審結積案埽除陋規表率有方勤勞  
卓著洵爲爲守兼優振奮特立堪任司道之才

山東候補知府全士琦

該員心思縝密事理精詳操守堅貞才具沈毅在山東歷任繁劇州縣吏畏民懷治行卓著輿論交推洵爲有膽有識振拔異常堪任道府之才

四川候補知府易履泰

該員廉潔自好才氣深穩力求真實不隨俗移在四川候補正當風氣奔競浮夸日甚該員獨秉堅貞遇事盡心任

勞任怨洵爲清介拔俗幹練有爲堪任道府之才